



REPUBLIKA E SHQIPËRISË
KOMISIONI I PROKURIMIT PUBLIK

Nr. 1841/ 6 prot.

Datë 25.06.2026

V E N D I M
Nr. 865/2026

Komisioni i Prokurimit Publik, i përbërë nga:

Fiorent Zguro	Nënkryetar
Anila Malaj	Anëtar
Gjergj Mersini	Anëtar

Në mbledhjen e datës 25 .06.2026 shqyrtoi kërkesën me:

Objekt: Modifikimi i dokumenteve të procedurës së prokurimit “E hapur, e thjeshtuar”, me nr. REF-88974-06-05-2026, me objekt “Bojë betoni për lyerjen e pedonales së liqenit të Paskuqanit”, me fond limit 5,166,667.00 lekë pa TVSH, parashikuar për t’u zhvilluar në datë 18.06.2026 nga autoriteti kontraktor, Ndërmarrja e Shërbimeve Publike Kamez.

Ankimues: Operatori ekonomik “Alb Korrekt” Shpk me NIPT L61621027F dhe me adresë Rruga Kryesore, Banesa Nr.1, Shupenze, Bulqize.

Autoriteti Kontraktor: Ndërmarrja e Shërbimeve Publike Kamez.
Adresa : Bulevardi “Nënë Tereza” nr.492 Kamëz Tiranë

Baza Ligjore: Ligji nr. 162/2020 “Për Prokurimin Publik”, i ndryshuar, Vendimi i Këshillit të Ministrave nr. 285, datë 19.05.2021 “Për miratimin e rregullave të prokurimit publik”, i

ndryshuar, Vendimi i Komisionit të Prokurimit Publik Nr. 766, datë 13.10.2021 “Për miratimin e rregullave për organizimin dhe funksionimin e Komisionit të Prokurimit Publik”, Neni 4 i Vendimit të Komisionit të Prokurimit Publik nr. 500/2020 datë 5.11.2020 “Rregullore për Marrjen e Masave Organizative për Ushtrimin e Veprimtarisë së Institucionit të Komisionit të Prokurimit Publik gjatë gjendjes së pandemisë së shkaktuar nga COVID -19.

Komisioni i Prokurimit Publik, pasi shqyrtoi ankesat e paraqitura nga operatorët ekonomikë ankimues dhe pasi diskutoi çështjen në tërësi,

Vëren:

I

Vlerësimi paraprak

I.1. Vlera limit e përlogaritur për procedurën e prokurimit objekt - ankimi është nën kufirin e ulët monetar, ndaj shqyrtimi dhe vendimmarrja do bëhet nga tre anëtarë, në përputhje me pikën 1, të nenit 30 të ligjit nr. 162/2020 “Për prokurimin publik”, i ndryshuar dhe Rregullat e Prokurimit Publik.

I.2. Operatori ekonomik ka prima facie interes në këtë procedurë prokurimi dhe për këtë arsye legjitimohet për të paraqitur ankesë në lidhje me të.

I.3. Operatori ekonomik ankimues ka paraqitur ankesë pranë autoritetit kontraktor dhe njëherazi pranë Komisionit të Prokurimit Publik, në përputhje me kërkesat e përcaktuara në ligjin nr. 162/2020 “Për prokurimin publik”, i ndryshuar.

I.4. Ankimuesi nuk ka plotësuar kushtet formale të paraqitjes së ankesës pranë Komisionit të Prokurimit Publik.

II

Rrethanat e çështjes

II.1. Në datën 08-05.2026 është publikuar në Sistemin e Prokurimeve Elektronike procedura e prokurimit “E hapur, e thjeshtuar”, me nr. REF-88974-06-05-2026, me objekt “Bojë betoni për lyerjen e pedonale së liqenit të Paskuqanit”, me fond limit 5,166,667.00 lekë pa TVSH,

parashikuar për t'u zhvilluar në datë 18.06.2026 nga autoriteti kontraktor, Ndërmarrja e Shërbimeve Publike Kamez.

II.2. Në datën 10.06.2026 nëpërmjet Sistemit të Ankesave Elektronike pranë Komisionit të Prokurimit Publik, është administruar ankesa me numër ankimi elektronik A/2026/6779 dhe me nr. 1841/2026 prot., datë 11.06.2026 e operatorit ekonomik “Alb Korrekt” SHPK për procedurën e mësipërme të prokurimit, duke kërkuar modifikimin e dokumenteve të procedurës së prokurimit objekt-ankimi.

II.3. Bazuar në nenin 112 pika 3 të ligjit 162/2020 “Për Prokurimin Publik”, i ndryshuar, Komisioni i Prokurimit Publik ka publikuar në bazën e të dhënave të tij, të dhëna për: a) ankimuesin, adresën dhe NUIS-in; b) të dhëna të plota për procedurën e prokurimit (objekt, numër reference, fond limit, datën e zhvillimit të procedurës) si dhe ankesën e plotë të ankimuesit.

II.4. Nga shqyrtimi i dokumentacionit bashkëngjitur ankesës së mësipërme konstatohet, se formulari i ankesës së dorëzuar është me të meta, pasi mungon dokumenti bankar që vërteton pagesën e tarifës përkatëse për ankesën e paraqitur.

II.5. Nëpërmjet sistemit të ankesave elektronike autoriteti kontraktor me shkresën nr. 900 prot., datë 17.06.2026, protokolluar me tonën me nr. 1841/1 prot. Datë 17.06.2026 , ka depozituar në Komisionin e Prokurimit Publik vendimin e Komisionit të Shqyrtimit të Ankesave nr. Nr. 871/4 prot., datë 17.06.2026 lidhur me ankesën e operatorit ekonomik ankimues “Alb Korrekt” SHPK. Referuar vendimit të KSHA rezulton se ky i fundit ka refuzuar ankesën e operatorit ekonomik ankimues duke argumentuar: *[...]Autoriteti Kontraktor, pasi verifikoi ankesën e operatorit ekonomik konstatoi se operatori ekonomik nuk ka paraqitur mandat pagesën në sistemin e KPP-së. Autoriteti kontraktor në zbatim të nënit 111, pika 3 dhe pika 4 të ligjit nr.162, datë 23.12.2020 “Për prokurimin publik”, i ndryshuar si dhe nenin 94, të VKM nr. 285, datë 19.05.2021 “Për miratimin e rreullave të Prokurimit publik” i ndryshuar, ka njoftuar operatorin ekonomik “Alb Korrekt” SHPK nëpërmjet postës elektronike (e-mail) më datë 15.06.2026, me kërkesë “në rast se nuk depozitoni mandat pagesën për tarifën e ankesës brenda afatit ligjor prej dy ditësh, ankesa juaj nuk do të shqyrtohet nga autoriteti kontraktordhe do të vlerësohet si e paparaqitur”.*

Komisioni i Shqyrtimit të Ankesave, vlerëson si më poshtë, vijon:

KSHA: pasi verifikoi në sistemin e KPP-së se operatori ekonomik nuk ka paraqitur mandat pagesën, si dhe pasi konstatoi se operatori ekonomik sërish nuk e ka paraqitur mandat pagesën pavarësisht faktit që është njoftuar me postë elektronike (e-mail). me datë 15.06.2026 nga autoriteti kontraktor, operatori ekonomik nuk ka reaguar dhe nuk ka marrë masa për paraqitjen e mandatit të pagesës për ankimimin në fjalë.

Për sa më sipër, KSHA pasi konstatoi mungesën e mandat pagesës në sistemin e KPP-së, si dhe pasi shqyrtoi dhe verifikoi veprimet proceduriale të ndjekura nga autoriteti kontraktor, doli në

përfundim se ankesa e operatorit ekonomik nuk do të shqyrtohet nga Autoriteti Kontraktor dhe do të vlerësohet si e paparaqitur për faktin se nuk e ka korrigjuar ankesën pavarësisht njoftimit 2 (dy) ditor si afat kohor. Nisur nga ky fakt ligjor, pretendimet e operatorit ekonomik ankimes nuk qëndrojnë pasi nuk e ka korrigjuar ankesën pavarësisht njoftimit 2 (dy) ditor si afat kohor për korrigjimin e ankesës.

Për sa më sipër, në mbështetje të nenit 111, pika 3 dhe pika 4 të ligjit nr. 162, datë 23.12.2020 "Për Prokurimin Publik", i ndryshuar, si dhe nenit 94, 95, 96 të V.K.M-së nr. 285, datë 19.5.2021 "Për Miratimin e Rregullave të Prokurimit Publik", i ndryshuar, si dhe referuar 871 prot, datë 11.06.2026 "Për ngritjen e KSHA-së për shqyrtimin e ankesës së operatorit ekonomik "ALB-KORREKT" SH.P.K për procedurën e prokurimit me objekt: "Bojë betoni për lyerjen e pedonales së liqenit të Paskuqanit", me REF-88974-06-05-2026", Komisioni i Shqyrtimit të Ankesave:

VENDOSI

1. Të refuzojë ankesën e operatorit ekonomik "ALB-KORREKT" SH.P.K, për procedurën e prokurimit "E Hapur e Thjeshtuar (Mallra)" me REF-88974-06-05-2026, me objekt: "Bojë betoni për lyerjen e pedonales së liqenit të Paskuqanit" dhe me fond limit 5,166,667 (pesë milion e njëqind e gjashtëdhjetë e gjashtë mijë e gjashtëqind e gjashtëdhjetë e gjashtë) lekë pa tvsh, e zhvilluar me datë 18.06.2026 nga Autoriteti Kontraktor, Ndërmarrja e Shërbimeve Publike, Kamëz.

II.6 Me qëllim verifikimin e mëtejshëm në lidhje me pagesën e tarifës financiare, KPP iu drejtua me kërkesën nr.1841/2 prot., datë 22.06.2026 Drejtorisë së Monitorimit, Shërbimeve Mbështetëse dhe Financës pranë KPP-së për informacion mbi pagesën e tarifës financiare të kryer nga operatori ekonomik "Alb Korrekt" SHPK për procedurën e prokurimit objekt-ankimi.

II.7 Me shkresën Nr 1841/3 datë 24.06.2026, lidhur me kërkesën e bërë për statusin e ankesës së operatorit ekonomik "Alb Korrekt" SHPK sektori i Financës së KPP informoi se "Në pergjigje te kerkesës tuaj nr.1841/2 prot., datë 22.06.2026, me lënde: "Kërkesë per verifikim pagese", ju bëjmë me dije si më poshte: Për ankesën me nr.1841/2026 prot., datë 11.06.2026, me numer aplikimi elektronik A/2026/6779, Operatori ekonomik " Alb Korrekt " SHPK, nuk ka kryer pagesë në favor të KPP për ankesën e sipërcituar

Në vijim të shkresës tuaj i është kerkuar Degës së Thesarit raporti për arkëtimet, ku sipas verifikimeve te kryera me raportin e dërguar per arkëtimet e kryera deri më datë 18.06.2026, rezulton se Operatori Ekonomik " Alb Korrekt " Shpk nuk ka kryer pagesë në favor të Komisionit të Prokurimit Publik për ankesën e sipërcituar."

III

Komisioni i Prokurimit Publik

pas shqyrtimit të pretendimeve të operatorit ekonomik ankimues, informacionit dhe dokumentacionit të paraqitur nga autoriteti kontraktor,

Arsyeton:

III.1. Lidhur me ankesën e paraqitur në Komisionin e Prokurimit Publik në datë 10.06.2026 me nr. 1841 prot., datë 11.06.2026 nga operatori ekonomik “Alb Korrekt” SHPK, për modifikimin e dokumenteve të procedurës së prokurimit të sipërcituar, Komisioni i Prokurimit Publik konstaton, se operatori ekonomik ankimues nuk ka kryer pagesën e tarifës financiare për ankesën e mësipërme, në përputhje me përcaktimet në nenin 111, të ligjit nr. 162/2020 “Për prokurimin publik, i ndryshuar ku parashikohet se:

“1. Operatori ekonomik ankimues dërgon njëkohësisht ankesën në autoritetin ose entin kontraktor dhe Komisionin e Prokurimit Publik. Rregulla të posaçme për mënyrën e paraqitjes së ankesës përcaktohen në rregullat e prokurimit publik.

2. Ankesa bëhet sipas formularit përkatës, ku shënohen emri dhe adresa e ankuesit, referimi për procedurën konkrete dhe bazën ligjore, ku ankuesi pretendon për shkeljet, pagesa e tarifës së ankesës, duke e shoqëruar atë me dokumentacionin dhe provat përkatëse, për të cilat mendon se mbështesin ankimin e tij. Elementet e sipërpërmendura janë të domosdoshme për shqyrtimin e ankesës. Ankimuesi është i detyruar t'i bashkëlidhë ankimit dokumentin bankar që vërteton pagesën e tarifës përkatëse për ankesën.

3. Nëse mungon ndonjë nga elementet e sipërpërmendura ose formulari nuk është plotësuar në mënyrën e duhur, atëherë autoriteti ose enti kontraktor duhet të vërë në dijeni ankimuesin për të plotësuar formularin. Njoftimi mund të bëhet me çdo mjet të mundshëm, përfshirë edhe postën elektronike, dhe në çdo rast dokumentohet. Nëse ankesa nuk korrigjohet brenda 2 ditëve nga njoftimi, ajo vlerësohet si e paparaqitur.

4. Në çdo rast, paraqitja e ankesës shoqërohet me mandatpagesën e bërë pranë Komisionit të Prokurimit Publik.”

III.1.1. Në gërmën “a” të pikës 2, të nenit 118 të ligjit nr. 162/2020 “Për prokurimin publik”, është parashikuar se: “2. Përpara lidhjes së kontratës, Komisioni i Prokurimit Publik ka të drejtë:

a) të refuzojë ankesën, për shkak të mosplotësimit të elementeve të domosdoshme për shqyrtimin e saj, sipas parashikimeve të nenit 111 të këtij ligji;”

III.1.2. Autoriteti kontraktor me shkresën nr. 900 prot., datë 17.06.2026, protokolluar me tonën me nr. 1841/1 prot. Datë 17.06.2026, ka depozituar në Komisionin e Prokurimit Publik vendimin e Komisionit të Shqyrtimit të Ankesave nr. 871/4 prot., datë 17.06.2026 lidhur me ankesën e operatorit ekonomik ankimues “Alb Korrekt” SHPK. Referuar vendimit të KSHA-së, nr. 900 prot., datë 17.06.2026, rezulton se kjo e fundit ka shqyrtuar ankesën e operatorit ekonomik ankimues

dhe në përfundim ka vendosur refuzimin e saj, për shkak të moskorrigjimit të të metave të ankesës nga operatori ekonomik ankimues.

III.1.3. Referuar pikës 2, të nenit 111 të LPP-së, Komisioni thekson, se ligjvënësi ka përcaktuar disa elemente të domosdoshme formale për paraqitjen e ankesës, njëkohësisht pranë Komisionit të Prokurimit Publik dhe autoritetit kontraktor. Një prej elementeve të domosdoshme për paraqitjen e ankesës është edhe dokumenti bankar, që vërteton pagesën e tarifës përkatëse për ankesën. Ndërsa referuar pikës 3, të nenit 111 të LPP-së, Komisioni gjykon, se ligjvënësi i ka dhënë një mundësi ankimuesve që të korrigjojnë ankesat e tyre në rast se konstatohet mungesa e një apo më shumë elementeve formale të përcaktuara në pikën 2, të nenit 111 të LPP-së. Me anë të kësaj mundësie, ligjvënësi ka dashur të përcjellë frymën, se nuk mund t'i refuzohet e drejta e ankimit të subjekteve që pretendojnë se dëmtohen ose rrezikojnë të dëmtohen nga një vendimmarrje e autoritetit kontraktor në mënyrë apriori, vetëm për shkak të disa mungesave formale, të cilat mund të korrigjohen lehtësisht brenda një afati të arsyeshëm, që nuk cenon parimin e efikasitetit në procedurat e prokurimit publik. Bazuar në dispozitën e mësipërme, për të konstatuar mungesat lidhur me elementet formale të ankesës, si dhe për të vënë në dijeni ankimuesin lidhur me mungesat e konstatuara është detyrim i autoritetit kontraktor, i cili duhet të njoftojë menjëherë ankimuesin me çdo mjet të mundshëm, duke i lënë 2 ditë kohë për të korrigjuar elementet e domosdoshme formale të ankesës. Referuar shkresës nr. 900 prot., datë 17.06.2026, rezulton, se autoriteti kontraktor ka zbatuar përcaktimet e bëra nga ana e ligjvënësit në pikën 3, të nenit 111 të LPP-së, duke respektuar hapat proceduralë që parashikon kjo dispozitë ligjore, duke i kërkuar operatorit ekonomik ankimues, ndreqjen e të metave të ankesës, si në rastin konkret, kryerjen e pagesës së tarifës për ankesën e kryer nga ky i fundit. Gjithashtu me shkresën 1841/3 prot., datë 24.06.2026, lidhur me kërkesën e bërë për statusin e ankesës së operatorit ekonomik "Alb Korrekt" SHPK, Sekori i Financës informon se: *[...]Në pergjigje te kerkesës tuaj nr.1841/2 prot., datë 22.06.2026, me lënde: "Kërkesë per verifikim pagese", ju bëjmë me dije si më poshte: Për ankesën me nr.1841/2026 prot., datë 11.06.2026, me numer aplikimi elektronik A/2026/6779, Operatori ekonomik " Alb Korrekt " SHPK, nuk ka kryer pagesë në favor të KPP për ankesën e sipërcituar*

Në vijim të shkresës tuaj i është kërkuar Degës së Thesarit raporti për arkëtimet, ku sipas verifikimeve të kryera me raportin e dërguar për arkëtimet e kryera deri më datë 18.06.2026, rezulton se Operatori Ekonomik " Alb Korrekt " Shpk nuk ka kryer pagesë në favor të Komisionit të Prokurimit Publik për ankesën e sipërcituar."

Komisioni i Prokurimit Publik, thekson faktin se përcaktimi i procedurave të caktuara në LPP dhe Rregullat e Prokurimit Publik, duke filluar nga shqyrtimi i dokumenteve standarde të tenderit, përgatitja e ofertës, shqyrtimi i ofertave, ankimimi, si dhe mundësia për të korrigjuar mangësitë lidhur me elementet e domosdoshme formale të ankesës, përfaqësojnë garanci dhe siguri juridike për palët e interesuara. Parimi i ligjshmërisë është ndër parimet kryesore të veprimtarisë së organeve të administratës publike. Gjithashtu, ndër parimet kryesore të zhvillimit të procedurave të prokurimit, parashikuar nga lex specialis LPP, janë ato të mosdiskriminimit, transparencës dhe

barazisë. Tërësia e elementeve të mësipërme, lidhet ngushtësisht me elemente të ligjshmërisë së vendimeve të organeve të administratës publike.

III.1.4. Sa më sipër, në kushtet kur operatori ekonomik ankimues nuk ka paguar tarifën financiare të ankesës, si dhe ka refuzuar ndreqjen e të metave sipas parashikimeve të pikës 3, të nenit 111, të ligjit nr. 162/2020 “Për prokurimin publik”, Komisioni gjykon, se ankesa e operatorit ekonomik “Alb Korrekt” SHPK nuk plotëson një prej elementeve të domosdoshme për shqyrtimin e ankesës, ndaj, bazuar në germen “a”, të pikës 2, të nenit 118, të ligjit nr. 162/2020 “Për prokurimin publik”, kjo ankesë duhet refuzuar.

Për sa më sipër, në mbështetje të nenit 30 dhe 118 të ligjit nr. 162/2020 “Për Prokurimin Publik”, Vendimi i Këshillit të Ministrave nr. 285, datë 19.05.2021 “Për miratimin e rregullave të prokurimit publik”, i ndryshuar, Vendimit të Këshillit të Ministrave nr. 261, datë 17.03.2010 “Për përcaktimin e tarifës dhe të rregullave për pagimin e saj, në një procedurë ankimimi, pranë Komisionit të Prokurimit Publik”, Vendimi i Komisionit të Prokurimit Publik Nr. 766/2024, datë 13.10.2024 “Për miratimin e rregullave për organizimin dhe funksionimin e Komisionit të Prokurimit Publik”, nenit 4, të Vendimit të Komisionit të Prokurimit Publik nr. 500/2020 datë 5.11.2020 “Rregullore për Marrjen e Masave Organizative për Ushtrimin e Veprimtarisë së Institucionit të Komisionit të Prokurimit Publik gjatë gjendjes së pandemisë së shkaktuar nga COVID -19”, Komisioni i Prokurimit Publik njëzëri,

Vendos

1. Të mos pranojë ankesën e operatorit ekonomik “Alb Korrekt” SHPK për procedurën e prokurimit prokurimit “E hapur, e thjeshtuar”, me nr. REF-88974-06-05-2026, me objekt “Bojë betoni për lyerjen e pedonales së liqenit të Paskuqanit”, me fond limit 5,166,667.00 lekë pa TVSH, parashikuar për t’u zhvilluar në datë 18.06.2026 nga autoriteti kontraktor,
Ndërmarrja e Shërbimeve Publike Kamez.
2. Autoriteti kontraktor lejohet të vijojë me hapat e mëtejshëm të procedurës së prokurimit të sipërcituar.
3. Kundër këtij vendimi, mund të bëhet ankim në Gjykatën Administrative të Apelit.
4. Kopje e këtij vendimi i dërgohet për njoftim Agjencisë së Prokurimit Publik.
Ky vendim hyn në fuqi menjëherë.

KOMISIONI I PROKURIMIT PUBLIK

Anëtar
Anila Malaj

Anëtar
Gjergj Mersini

Nënkryetar
Fiorent Zguro

